

卷三目錄

詩云宜兄宜弟

三句

彭濬源

衣思永

三十而立

二句

金德昌

來培厚

信近於義

四句

張蘭溪

賈慥

關玉齋

其知可及也

二句

蔣芝蘭

田夢白

享禮有容色

二句

澹于鴻恩

當暑袵絺綌

二句

于文鏞

陳長舉

君子質而已矣

二句

王文斌

孟昭豫

王文墀

子曰管仲相桓公

四句

袁玉清

孟憲綸

馬宗敦

來培厚

樂民之樂者

四句

張維清

耕者九一

二句

侯桐封

何玉堂

馬蔭榮

市廛而不征

二句

孟昭豫

喬洪鈺

王文墀

天子之地方千里 至宗廟之典籍

董廣勛

李文翥

趙毓鰲

君子反經而已矣

二句

張樹梅

于士達

王嘉誥

何以聚人曰財 至曰義

金德昌

大戰于甘

二句

王文埤

孟昭豫

李瞻泰

厥貢鹽絺 至厥篚檿絲

張維清

賈澔

張蘭溪

靈雨既零

四句

田夢白

天子諸侯無事

五句

董召棠

裴子晏

衣思永

命工師 至母或不良

張樹梅

張樹德

侯春藻

崔長楷

故天降膏露

四句

李文翥

于文鏞

詩云宜兄宜弟宜兄宜弟而治可以教國人

彭濬源

骨肉無參商之弊斯朝野有雍穆之休九族未睦而遽期百姓昭明者無是道也不觀蓼蕭之詩乎夫蓼蕭之詩美諸侯也美其足以治國也乃詩不言國而言家且不言家而言兄弟一若齊家之功必本於兄弟治國之效亦不外此兄弟者蓋嘗誦是詩而竊得其故矣夫人情不甚相遠也家國之理本息相通也我有兄而不能祇恭又違問人之兄乎我有弟而不能和協又違計人之弟乎是故深宮置酒初無意於國人也而國人聞而慕之矣拊膺興歎亦無與於國人也而國人起而譏之矣此豈國人之難教哉誠以官禮之治必本睦隣平章之功不外媿睦有以宜兄有以宜弟而后有以宜國人也然而詩未嘗明言也詩但言其處兄弟其於兄弟之外固未嘗一言道及矣然而詩亦不啻明言也詩既善其處兄弟其於兄弟之外正可連類推之矣我觀花萼名樓睦兄弟也而萬民遂生友愛之心灼艾分痛愛兄弟也而四海因無紛爭之俗可知善處兄弟者未有不善處家者亦未有不善處國者也雖然家與國有相通之理家與國實有相連之機宮廷多故而

○遺○欲○民○歌○棠○棣○難○矣○手○足○無○傷○而○猶○慮○民○傷○角○弓○亦○拘○矣○傳○者○引○而○釋○之○蓋○以○見○家○者○國○
○之○本○而○兄○弟○又○家○之○本○也○後○世○不○察○往○往○舍○家○而○求○國○一○曰○不○友○之○罰○二○曰○不○悌○之○罰○以○
○爲○是○卽○所○以○教○國○矣○豈○知○深○宮○下○拘○留○之○詔○父○老○亦○聞○而○傷○心○大○臣○進○削○藩○之○謀○愚○賤○亦○
○見○而○生○議○君○子○觀○夫○上○下○一○體○中○外○相○因○而○後○知○詩○言○洵○有○深○意○也○而○不○知○者○乃○欲○以○美○
○言○小○數○愚○顛○蒙○焉○嗟○乎○尺○布○斗○粟○之○謠○烏○可○令○國○人○聞○哉○

詩云宜兄宜弟宜兄宜弟而后可以教國人

衣思永

兩間太和之象。基於友恭。一門聚順之休。釀成雍睦。是故擅封請邑。王朝勿用其謀。強幹
弱枝。盛世弗行其術。凡以兄弟者。朝廷之懿親。國家之屏翰。起化於家。而卽以成教於國。
者。皆其君子之善處兄弟。不翦棄之。而和協之。故能使宗室有所依庇。國人有所觀法也。
傳者引蓼蕭之詩。詠宜兄宜弟。而釋其義於教國人。足以爲治國之君子訓矣。今夫國人
各有其兄。不宜其兄。國無禮義之俗也。國人各有其弟。不宜其弟。國無敦睦之風也。無敦
睦則國何以興仁。無禮義則國何以興讓。是故欲治其國者。將明禮義以教讓。必使國人

之恭厥兄。將訓教睦以行仁。必使國人之友于弟。不知國人之宜兄宜弟。可教也不可先也。今取蓼蕭之次章而繹之曰宜兄。不陵長不加大。必君子自宜其兄。而后可以教國人。宜其兄也。曰宜弟。勿翦莠。勿圖蔓。必君子自宜其弟。而后可以教國人。宜其弟也。行葦之燕兄弟也。曰其爾。爾者近之也。常棣之燕兄弟也。曰既翕。翕者合之也。能近而合。馨無不宜矣。後之君子。或則嫡庶相爭。或則手足相殘。遠之非宜。故漢削宗室而卽衰。近之亦非宜。故元封諸王而尋滅。已有兄弟而不能善處。國之人尤而效之。此同室操戈。一門縱斧之禍。所以輾轉相尋。而未有已也。嗚呼。以不能宜兄宜弟者。而教國人。夫豈可哉。讀蓼蕭之詩。可以奮然興矣。

三十而立四十而不惑

金德昌

知與行爲學之道也。聖人爲千古學道之宗。亦示人以知行而已。如謂聖人生知安行。無待於學。恐以天資自諉者。終無由入聖人之域。夫聖人以天縱之質。猶不忘發憤敏求。自明其半生之刻勵。則敦行必需之十五年。而後理之蘊於衷懷者。固致知必需之十年。而

後事之遇於當境者明。此志學以往之實效。迴憶焉而爲天下萬世告也。聖人之立何如也。譬如石焉。安之得其所則立。至於山之聳峙亦立也。譬如木焉。培之得其道則立。至於根之蟠結亦立也。聖人之立。殆所謂本立而道生者歟。人有所疑則惑。聖人之不惑何如也。如鏡之懸焉。無所翳者則不惑。如淵之澄焉。無所障者則不惑。聖人之不惑。殆所謂知明而處當者歟。要之聖人所謂立與不惑。有欲立立人之願。必使學聖人者。至三十而皆立。而異端之攻聖學者。無所用其剖擊矣。有傳道解惑之願。必使學聖人者。至四十而皆不惑。而邪說之誣聖學者。無所用其口舌矣。斯乃謂聖人之立。斯乃謂聖人之不惑。

三十而立四十而不惑

來培厚

聖人之學。無所事守也。無所爲疑也。行之至而游移悉去。卓然者自見不撓。知之明而毫釐胥判。洞然者自見無蔽。記曰強立而不返。謂之大成。中庸曰明則誠矣。此學人進修之功。豈所語於大聖人哉。然聖人欲爲學者。示漸進之序。卽本身而作之則不可以躐等。不可以中止。故由志學而勉之曰三十而立。四十而不惑。其示人之意深矣。夫聖人之所謂

立者。非三十之前。倘入於歧途也。倘趨於異說也。蓋好惡之生於內者無定。當喜怒哀樂之發。而操持未固。性移於情。則易爲浮動。事變之來於外者無常。處震撼危疑之交。而主幸未一心搖於境。則轉多顧慮。惟特立之不回。誠憂憂乎其難哉。聖人所以由志學之後。遲之以十五年。而由虛得實。由博返約。使所學之理。常與一心相持守。乃有此強立之一候也。然持之堅矣。而於萬事之宜。猶未究其微也。守之固矣。而於萬物之繁。猶未通其變也。加之以玩索涵養之功。夫而後豁然其貫通矣。審於幾微之辨。而事理之當然無不照察於繁曠之故。而物理之當然無不悉知者。不惑昔之遜爲無能者。至此已可企及。迴憶能立之時。又十年加長矣。四十矣。此聖人知行並進之學也。然聖人言此已十十矣。由是而知命耳順。以至從心不踰矩。亦惟從容以俟之焉耳。

信近於義言可復也。恭近於禮遠恥辱也。

張蘭溪

誰則無信。而義實難定。誰則不恭。而禮實難盡。定義於方信之始。惟期始終不渝而已。不必更爲慷慨之誓也。盡禮於爲恭之際。惟有威儀無愆而已。何事拘於繁縟之節也。故一

言之發。謂其言之必踐不必也。特按之於義。斯信其可復耳。一敬之將。謂其必能化人難言也。特持之以禮。凡恥辱之自我而致者。自當遠耳。試卽有子之言。信與恭而進。詳其義。夫義所以制事。不詳察乎事之不可爲。而僂言相應。雖其後有辭以自飾。究何解於反覆。禮所以致敬。不熟思乎敬之不可僞。而過爲虛拘。雖本由虛懷之難禁。終將近於詔媚。惟不輕於約信。其義乃克全乎始終。惟不流於僞恭。其禮並能鉅乎物我。義所當然。始終可守也。而何言之不可復。禮固如是。物我兩化也。而何恥辱之不可遠。藉非然者。游行者流以立信。見重於世。啓口可以誓天日。然諾足以質山河。甚至薄骨肉之親。廢衣食之業。而欲捐軀於一言之相訂。此亦可謂之復言者也。人世鄉原之尤。其言則娓娓然可親。其容則煦煦然可近。而又復貌飾禮儀。動少愆尤。使人望而生敬。不忍詆訾其矯飾。此亦可謂之恭。此亦可謂之以恭而遠恥辱也。然而彼之所謂復言。誠復言矣。而度諸聖賢慎言之學。則徒流入於游俠而已。賊義之人也。彼之所謂遠恥辱。非真能遠恥辱也。專務乎同流俗。合汚世。不自知其非。而人亦莫能非之而已。害禮之人也。有子以義爲信之本。以禮爲

恭之準。以示人復言遠恥辱之要。豈自外於正學者所得而竊其似哉。

信近於義言可復也。恭近於禮遠恥辱也。

賈 澹

士君子持身涉世。亦義與禮而已。自後世機械變詐。節操卑靡。遂使盟約繁而人高然諾之風。逢迎甚而人尙閭媚之行。非慷慨激昂以任氣。卽脂韋突梯以貽羞。使聖人作孚作肅之至意。悉掩於自高自卑之人心。故有子殷殷以近義近禮。爲天下持己接物者訓也。古聖人本天地中和之蘊。以立人生性情之防。利物嘉會。義禮實出於同原。制內防外。信恭豈分爲二念。義禮宰信恭之先。信恭達義禮之後。所以大信不約。大敬若慢。不服人而人無不服。不侮人而人自不侮。此三代之高風亮節。非晚近所能襲取也。迨至世風不古。每況愈下。非信由義行。而以信明義。非恭由禮達。而以恭明禮。姑無論指天誓日。一轉瞬而旋負約盟。執玉奉牲。無敬意而每形傲惰。卽使抱柱而立。負劍而驅。倒履以迎。擁篲以候。推其心非不磊落軒天地。謹懍矢冰淵。卒之直隣於絞。慎失於蕙。激烈殉俠客之盟。諂笑致夏畦之病。無怪小信爲曹劌所譏。足恭爲左氏所恥也。抑知義爲信之的。禮爲恭之

則。作。周。孚。先。言。不。期。復。而。可。復。作。周。恭。先。恥。辱。不。期。遠。而。自。遠。故。聖。主。結。盟。訂。約。而。詔。書。皆。誠。強。虜。捧。之。而。感。泣。史。臣。折。矩。周。規。而。卑。亢。不。失。敵。國。見。之。而。生。憚。無。非。以。義。禮。宰。之。於。心。以。信。恭。見。之。於。行。也。易。曰。有。孚。擊。如。惕。若。乃。可。以。无。咎。謙。不。違。則。謙。尊。自。能。以。彌。光。非。即。有。子。近。義。近。禮。之。旨。歟。

信近於義言可復也恭近於禮遠恥辱也

關玉齋

踐。言。慎。行。貴。衷。諸。當。而。已。故。立。乎。言。行。之。準。即。協。乎。言。行。之。宜。酌。乎。言。行。之。中。即。免。乎。言。行。之。累。合。持。身。接。物。以。妙。一。心。之。權。衡。則。內。心。有。主。自。外。侮。不。生。矣。有。子。欲。人。之。謹。其。始。也。曰。信。近。於。義。則。言。可。復。恭。近。於。禮。則。遠。恥。辱。夫。天。下。無。不。信。而。可。以。對。人。者。亦。無。足。恭。而。可。以。尊。己。者。使。尙。俠。烈。而。輕。於。自。許。負。愧。於。綱。常。者。必。多。務。謙。遜。而。故。爲。屈。抑。受。侮。於。權。豪。者。不。少。失。之。於。義。何。以。全。其。爲。信。也。失。之。於。禮。何。以。全。其。爲。恭。也。而。近。焉。者。則。無。慮。此。也。不。必。念。念。得。其。正。奉。此。義。以。爲。準。繩。而。因。時。制。宜。不。爲。愚。忠。愚。孝。不。必。在。在。協。於。中。循。此。禮。以。爲。典。則。而。制。節。謹。度。自。見。有。本。有。文。將。見。準。乎。理。不。任。乎。氣。僚。友。當。共。鑒。其。衷。

而何至措施之或窮也中乎節不過乎文威武亦莫屈其量而何有狎侮之交至也乃或者謂精義入神必幾微盡合於義始見大信之不約非禮弗履必纖悉盡協於禮始見尤恭之無私此詣之幾於化者徒以近自之不得也近焉者信與恭未極其當義與禮已得其端信非期其言之復而近義之信不必實驗其復而已庶幾其可復也恭非期其恥辱之遠而近禮之恭不必實徵諸遠而已庶幾其可遠也以視夫牽於時勢要約以旦夕渝曲爲趨承舉動以乖違譏者不亦大相逕庭哉孔子曰君子義以爲質禮以行之信以成之雖未明言近義近禮而已決其禮義之無愆矣有子之爲此言也蓋欲人之制於後不若謀於前也其無忘謹始之意也夫

其知可及也其愚不可及也

蔣芝蘭

世人所樂得者知之名所不欲有者愚之目獨至於君國危難之秋則智巧之士每退避而不肯前而忠悃者獨周旋其間冒艱險而不辭蹈危疑而不懼此其中有出於人者焉有根於天者焉出於人者猶可勉強根於天者不容僞爲也不然衛之武子處文成有道

無道之際前後若出自兩人者。豈武子故有知愚之分哉。子乃曰。其知可及其愚不可及。抑又何也。大抵人之可以勉爲者。必其事一出於從容。爲心思材力所能及。審慎於幾先。自不至貽誤於事後。凡稍知自愛者。皆能之。蓋無他人也。非天也。故曰。其知可及也。至於愚。知有親而不知身體髮膚之可愛。則爲愚。孝。知有君而不知身家性命之難保。則爲愚。忠。濟則君之幸也。國之福也。塞。塞孤忠。固可以對神明而質幽獨。不濟則子之責也。臣之分也。凜凜大義。尤足以光日月而壯山河。後世之臨事。一無可否。反假詩書以文奸。當幾漫無是非。反託忠孝以欺世者。類皆效武子之知。則有餘。爲武子之愚而不足者。也多。一知。卽多一趨避之巧。少一愚。乃少一性命之真。天生武子。若不以知擅其長。而其愚獨足。千古者。非以其得於天者。眞非有生所能假。全於人者。大非片念所得私乎。是以賢如伯玉。第見其卷懷直如史魚。空傳乎尸諫。迄今讀宛濮之盟。而囊牛出奔。竊恐非武子。則扞衛牧圉之無人也。傳曰。君憂臣辱。君辱臣死。是猶有計較禍福利害之見。若武子者。以委曲之苦衷。作艱難之危行。其誰能及之。嗟嗟。世之齷齪者。旣不足與人家國事。而明哲者。

流又相率以保身全軀爲能使爲臣者盡懷此心將君父之難一誘諸無可如何焉天下事尙堪問哉聞武子之風庶知愧矣

其知可及也其愚不可及也

田夢白

國家用人。與人臣謀國。往往重智而輕愚。誠以資性明敏。易於圖功。識慮短淺。難於有濟。智愚之不相及。古今同慨。乃有智非私智。愚非真愚。以一身歷常變之境。以一心維綱常之大。如武子仕衛。其用智用愚。豈尋常之情。所可擬議哉。想其處文公之時。國家新造。朝野蒙休。殿陛之上。頌昇平矣。閭閻之間。慶康樂矣。列班聯者。功業銘於彝鼎。勳績著於旂帛。聲施爛然。彪炳史乘。武子則一無表見。第安其循循供職之常。卽謂之智。亦恒情所能耳。迨成公遘難。讒門構隙。未幾而臣與君訟矣。未幾而君爲臣幽矣。對簿之下。莫非危機。進醜之餘。更爲危境。武子一以愚忠處之。士榮莊子。誅則何慘。深室橐籥。供納惟勤。薄醜貨矣。延性命於一髮。魯君賂矣。冀意外之轉圜。成敗利鈍。非所敢計。險阻艱難。非所敢知。假令智者處之。不知置其君於何等矣。武子獨尾之出。先之入。君危俱危。君幽俱幽。謂之

爲愚則誠愚矣。然而曠觀臣品。恃才者不能愚。任智者不肯愚。熟於閱歷者。惟利是視。巧於趨避者。惟禍是懼。又委曲宛轉而不終於愚。嗟嗟愚如武子。洵足立千古。人臣之極則也。如唐之狄仁傑。當大周改命之餘。心乎社稷。艱苦萬狀。卒存唐社。其建樹非出於愚。然而推梁公之心。猶是武子之心也。宋之文天祥。當宋室垂危之際。力圖興復。崎嶇百端。卒以身殉。其施爲有類於愚。然而窺信國之志。不異武子之志也。凡世之爲人臣者。心榮寵利。顧戀身家。當安當之時。徇謹保祿。一遇變故。志節頓移。聞武子之風。庶幾知愧也哉。

享禮有容色私覲愉愉如也

淳于鴻恩

記享覲之儀。聖人遵聘禮也。周禮行人諸職。其所掌者。曰三享。曰私。曰九儀。煌煌鉅典。何其隆歟。然此爲大賓之禮。大客之儀。天子以親諸侯而行。其春朝秋覲。夏宗冬遇者也。若大夫聘於諸侯。不詳於周禮。而獨詳於儀禮。宜大聖人之遵行罔替。而隨在皆昭其和也。如執圭諸儀。子之能盡。聘問之禮也。如此。然嘗考之於聘禮。及期。官具幣。宰人告於君。君朝服出門。而後或展幣。或受書。或載具幣。習享。士執庭實。習夫人之聘。享亦如之。習公事。

不習私事。聘禮所謂公事者。卽享禮也。所謂私事者。卽私覲也。享禮者何。謂既聘而行享禮也。賓揚衣。奉束帛加璧。由闈西入。揖讓如聘時。而庭實所陳。炳焉蔚焉者。虎豹之皮也。爲駮爲籠者。乘馬之良也。其餘則有金龜焉。有竹箭焉。有齒革羽毛焉。而子於是時進退雍容。威儀卒度。威儀卒獲。將記所謂發氣焉。盈容者。殆卽子之有容色之謂歟。然既享矣。而茲又記子之私覲何哉。稽之聘禮。享畢。摯者出。請事。賓告事畢。又謂賓覲。奉束錦出。摯者請受賓禮。辭。聽命。賓奉幣入門左。公北面再拜。賓三退。返還。負序振幣進授。此私覲之禮也。記曰私覲愉愉焉。而子之私覲亦如是耳。顧或者曰。孔子以大夫而奉使。此小聘也。小聘曰問。有獻而無享。茲云享者。周末文勝。以時異也。或又曰。郊特牲有云。朝覲大夫之私覲。非禮也。不敢私覲。所以致敬也。然豈知子於定公初年。爲大司寇。大司寇者卿位也。不得謂無享也。郊特牲所云。乃臣從君行。非奉命出聘。亦不得概謂私覲非禮也。不然。何以記子之容儀。而與聘禮相合哉。嗟乎。時至春秋。帷房與卻子之師。衷甲患楚氛之惡。享禮不可言矣。命宗婦而用幣。謁鄭伯以求環。私覲不可問矣。而子獨於周旋晉接之時。不

亢不卑。而發皇其氣象焉。斯何如之秉禮哉。吾故日記享覲之儀。聖人遵聘禮也。

當暑袵絺綌必表而出之

于文鎮

無時敢褻者。君子之心。無事或褻者。君子之志。時非易褻之時。事非易褻之事。君子之必無敢褻。必無或褻。固也。若處易褻之時。爲易褻之事。而卒無敢褻。卒無或褻焉。是。非常人所能必也。惟然。記者乃愈有以見君子。鄉黨記君子衣服之制。有曰。當暑袵絺綌。必表而出之。夫暑之宜絺宜綌也。時之當然也。絺與綌之必袵也。事之宜然也。順時之當然。行事之宜然。盡人所同。何足爲君子異。所異者。必表而出之耳。詩曰。蒙彼絺綌。表而出之者。卽以絺綌爲繻絺之蒙也。又曰。衣錦尙絺。表而出之者。卽以絺綌爲絺之尙也。蓋君子之身。處則家人婦子。日相晤對。出則僚友君公。不廢周旋。一或不檢。不惟恐他人之非笑。卽自顧亦覺不安也。况炎蒸之氣。不時中人。而精者如絺。粗者如綌。願可恃乎。絺綌而皆出於袵。更可恃乎。常人於此。亦未必不表而出之也。然出則用之。入或去焉。閒則思之急。或忘焉。以爲處溽暑之時。爲禦暑之事。正取絺綌之袵。何必如是競競者。不過順時之當然。行